

2 Korinta

Yeisu ana totugunayao Korinta goi adi leta aiyuwoina

Livala Aba Vaita

Leta ame ana livala aba vaita madabokina 1 Korinta ana livala aba vaita goi kugite.

Leta ame Paulo be Timoti sietune ina Yeisu ana totugunayao Korinta goi yaidi. Boi Paulo da Korinta adi leta aivasi iginidi. Leta vakuumgoina be leta aitonina sitagau. Leta aiyuwoina moe 1 Korinta. Leta ame moe leta aivasina ina da Korinta yaidi.

Nakona tala 56 sinaena leta ame Paulo igini. Tutayana igini nakona tauyana Mesadoniya parovinsi goi ikaaiyaka go, asa giyaina yoina Pilipai o Bereya.

Leta ame itoboineda tabobo dadavato. Kúpwana 1 ina 7 moe dadava tayamo go, kúpwana 8 be 9 dadava aiyuwoina, kúpwana 10 ina 13 dadava aitonina.

Leta ame goi Paulo itasígina bego moitamou toina Yeisu boi ikawoi paisewa iguinuwe, tauna ina sinapu ivateteli nakae kaga kaga siisowóduwo yaina. Aiyuwoina ina sinapu da Korinta yaidi manuna itasígina. Tayamo mou Korinta goi moe Paulo geya latuwona tomota siemaisi ina paisewa Vala Dedevena manuna. Tauna tomota maniyedi geya siuyaoneyeta.

Tuwaina ivatétala vininabeso ana sinapu manuna.

Ame letayana goi itoboineda tagite Paulo ina matakoi da Korinta yaidi.

Leta Luluna

1. Leta ana togínina be ana tokatuyaivayao
1:1-2
2. Yaubada ina kipáiwala manuna *1:3-22*
3. Paulo ina kawoi be ina sinapu ilumavivisidi
1:23—7:16
4. Vininabeso Manuna *8:1—9:15*
5. Paulo vamoléyana tayamo ina lovina itasigi
10:1—13:10
6. Paulo ina vaduduwo *13:11-13*

Leta ana togínina be ana tokatuyaivayao

(2 Korinta 1:1-2)

¹ Komi Yaubada ana totugugunayao Korinta goi nakae komi Yaubada ina kimasabayao liliumi Akeya‡ parovinsi ana madabokina goi,†

Yau Paulo Guyau Yeisu ina vamoléyana Yaubada ina nuwonúwana goi be nakae siyada Timoti ami leta ame kaetune iwo komi yaimi.

² Yaubada Tamada be ida Tomoya Yeisu Guyau idi kanuwóiya be idi tuboina bei sivinimi.

Yaubada ina kipáiwala manuna

(2 Korinta 1:3-22)

³ Yaubada aba yapali!†^a Tauyana ida Tomoya Yeisu Guyau ina Yaubada be nakae Tamana!†^b

‡ **1:1** Akeya: Korinta asa tayamo Akeya parovinsi sinaena.

† **1:1** Gui 18:1. †^a **1:3** Luk 1:68; Rom 1:25, 9:5; 2Ko 11:31; Epe 1:3; 1Pi 1:3. †^b **1:3** Rom 15:6; 2Ko 11:31; Epe 1:3,17; 1Pi 1:3.

Tamanayana nuwokaapisina go, kipáiwala liliudi unadi moe Yaubadayana. ⁴ Ima mou liliudi goi ikipaiwolema e itoboinema ituli ta tokaiyakomou adi mou liliudi goi kakipaiwoledi Yaubada ina kipáiwala goi nakae boi kai bogina ikipaiwolema. ⁵ Moitamo. Guyau ina gedageda kalotowoidi gagaina, e nakae Guyau goi Yaubada ina kipáiwala ivaituwe yaima. Tauna itoboinema semao kakipaiwoledi. ⁶ E tutayana mou kababantedi, moe komi ami kipáiwala be ami yava manudi. Tutayana Yaubada ikipaiwolema, moe komi ami kipáiwala manuna. Kipaiwalayana ame nakae: Tutayana gedageda kai ima gedageda nakae kobaabantedi goi komeesayágana, e Yaubada ikipaiwolemi. ⁷ Ago kayagoi komi imi gedageda goi bei togaga. Bogina kayagoi imi gedagedayadi kai nakae kobaabantedi go, Yaubada bei ikipaiwolemi nakae kai bogina ikipaiwolema.

⁸ Moitamo Esiya parovinsi goi mou kababantedi go, latuwoma ima mouyadi koyagoidokoidi, segowo. Mouyadi kalootowoidi moumou sisaki, nakae geya itoboinemeta toinima ima togaga goi katogaga, tauna nukotoma itopa; ima lotówana kalotowoidi nakae bei kakámasa.† ⁹ U. Toinima nuwoma goi kanuwonúwana kama, 'Bei takámasa!' Tauna toinima ima togaga geya kanumiseyeta, go sem Yaubada tokámasa ikaitaaodi kanumise. ¹⁰ Tauyana aba vailai gagaidi goi iiyavema go, nava bei nakae iiyavema. Tauyana yaina kalotuta bego tuta liliuna bei iiyavema. ¹¹ Komi nakae imi kawanoi

† 1:8 1Ko 15:32.

goi kosiukōima. Latuwoma bego tomota bad-
 abadaidi sikauyagu Yaubada yaina ina kaiguyau
 yaima manuna; aiguyauyana moe tomota bad-
 abadaidi idi kawanoi pasina.

¹² Moitamo itoboinema kakawanoi yaimi bego
 kokawanoi manuma. Ima uyawana gagágasa
 goi nukotoma geya isabutukoidita go, ima
 uyawana gagagasayana moe ame: Bego Yaubada
 pasina ima sinapu da poyapoya yaidi moe
 mooitamoina be maavadaina go, moe gagaina
 toina komi yaimi goi. Go ima sinapuyadi geya
 kada poyapoya ana nanamsa goi geya, go sem
 Yaubada ina kanuwóiya yaima goi. ¹³⁻¹⁴ Moe
 moitamo. Ami leta kogite. Geya tayaamo kaga
 kavamoukoimi, go sem kaga liliuna letayana
 goi itoboinemi kokatuyaivi be koyagoi. Ego
 ame tuta tupwana koyagoima go, alotuta bego
 nava bei koyagoidoko kai pasima komi aedidimi
 bei kosamolai nakae komi pasimi kai aedidima
 kasamolai ida Tomoya Yeisu ina maliyalina goi.

¹⁵ Anumisa moe koyagoi, tauna guna
 nuwonúwana bego mainao ao avadademi
 bego guna vadadanayana pasina ami
 dedevina sivayuwoina kobabane. ¹⁶ Guna
 nuwonuwanayana ame nakae: Bego tutayana
 anonoina Mesadoniya go, ao avadademi. Niga
 tutayana Mesadoniya akalave, bego aiyuwoina
 ao yaimi. Moeko goi itoboinemi ma nimatoogu
 kovalavegu ana Yudiya.†

¹⁷ E tauna moe bego aguinuwe go, niga geya
 itoboineguta. Go manakae? Guna yúpuna
 goi akatubaumi nakae tomota maniyedi bogina

† 1:16 Gui 19:21.

siwowokoigu? Geya akatubaumita! O nakona konuwonúwana tutayana ayúpuna, sakava ina sinapu goi toinigu mainao ayúpuna kagu, ‘U, bei ao.’ Go, guna nuwonúwana moitamoe moe kagu, ‘Geya awoita.’ Moe nakae geya aguinuweyeta. ¹⁸ E kina Yaubada aba numisa iyagoida! Ima livala yaimi goi geya kapoleta geya! Tutayana kama, ‘U, bei kao’, e ima nuwonúwana nakae bei kaguinuwe. Neta kama, ‘Geya kawoita’, nakae bei kaguinuwe. ¹⁹ Bogina koyagoi. Yeisu ina sinapu kasabookuliye. Yaubada Natuna, moe Yeisu Guyau, boi yau, Silovano be Timoti taiyao katalavaite yaimi. Moe Tauyana geya ipoleta kana, ‘U, bei aguinuwe’ go, ina nuwonúwana kana, ‘Bei geya aguinuweta.’ Go sem Tauyana goi Yaubada ina katótula sisowóduwo nakae idige.† ²⁰ Moe moitamoe. Yaubada ina katótula liliudi Yeisu ina guinuwa pasina kana, ‘U, bei aguinuwe.’ Tauna nakae Yeisu goi Yaubada talatuwoko kada, ‘E nakae!’ Moe Yaubada ana taimámina manuna. ²¹ E Tauyana kai komi taiyao ikitogageda ida spwagógana Guyau taiyao pasina be nakae toinina umana ikinaveda moe Yaubada. ²² Tauyana ina kaba kinana ateda goi iyato moe Baloma Kimaasabaina. Balomayana goi tayagoi ina katótula bei iguinuwedi.

Paulo ina kawoi be ina sinapu illumavivisidi

(2 Korinta 1:23—7:16)

Paulo ina vadádana iupavile

† 1:19 Gui 18:5.

²³ E Yaubada iyagoida yau abóbwara moitamó! Boi latuwogu bego guna bolagu yaimi avakilisi. Moe pasina geya awoita moeko Korinta. ²⁴ Go moe geya bego imi numisa kalovinae geya, go sem kai komi imi tosavaiyuwo imi uyáwana manuna. Tauna imi numisa geya kalovinaeyeta geya. Bogina koyagó. Imi numisayana goi bogina kotaoyakavata!

2

¹ Moitamó geya kawoita. Yau toinigu bogina alovina ame: Neta ao avadademneimi go, guna bolagu pasina aiyuwóina kokategedamna, bei geya awoita. ² Neta yau pasigu kokategeda, e geya vatau tayaamo yaimi goi ikaaiyaka bei ivauyaonegu ae? ³ Nakae alovina, tauna boi nakae ami leta goi agini, govila bei ao kogienuwomouyegu. Ago itoboine komi kovauyaonegu! Bogina boi anumisa madabokimi yaimi bego yau guna uyáwana bei ivauyaonemi. ⁴ Amo letayana magu yogedageda gagaina be magu kategeda gagaina be magu táiya gagaina agini. Ago letayana aetune iwo geya bego kokategeda geya, go sem bego guna matakoi gagaina yaimi goi koyagó.

*Toogoyoina tayamo
da Korinta yaidi goi itoboinedi sinuwotao*

⁵ E boi toogoyoina yaimi goi yau ategeda geya iviniguta, go sem komi madabokimi ategedayana ana kakainaki ituli ituli ivinimi. Go geya latuwogu bego guna bóbwara goi tauyana ina goyo bolotona akatusavi. ⁶ Madabokimi

bogina koliune, e moe ina liunayana bogina yoiyana. ⁷ Tauna ame tuta ina goyo konuwotāo be kokipaiwōle, govila bei ina nuwomou ivakaigagasave. ⁸ Tauna akawanoi makimaki komi kolovina bego imi matakoi tauyana manuna kokamoitamoe be kokabivekovekomnei. ⁹ Moitamo nakae itoboinemi. Moe nakae boi letayana agini aetune iwo unana ame: Bego avakakonemi be ayagoi neta kaga liliuna alatuuwokoimi kokabikaonegu o geya. ¹⁰ E avatau neta ina goyo konuwotao, yau nakae anuwotao. Neta moitamo goyo tayamo iguinuwe, e kaga nakae bogina anuwotao, moe komi ami dedevina manuna Guyau matana goi anuwotao ¹¹ bego Kaleya geya itoboineyeta ikatubauda. Ina sinapu tulutuludi bogina tayagoidokoidi.

*Paulo ina nuwotúkala go,
Yaubada pasina Guyau Valena isagayako*

¹² E boi ana Tarowasi goi Guyau Valena Dedevina ana talavaita manuna. E ida Tomoya ina togaga goi totom ikatupáeva yau manugu bego valayana atalavaite yaidi go,† ¹³ balomaigu geya itoboineyeta iwaiwasi unana siyagu Taito geya ababaneyeta bego italavaitemi. Tuwo geya akaiyaketa, go sem sedao Tarowasi goi akalavedi go, ama ameko Mesadoniya goi asiu bego Taitoyana nakona ameko goi avalobode.

¹⁴ Go Yaubada yaina takauyagu unana tuta liliuna Tauyana yaviya ina tokalikumatana nakae ida spwagógana Guyau pasina ivakumgoiyeda bei tatogaga. Go Guyau valena moe emáina

† 2:12 Gui 20:1.

dedevina insensi nakae go, kai ima talavaita goi Yaubada ikaiwoduwe dadava liliudi bego tomota itoboinedi sisamkone, e bei Tauyana siiyagoi. ¹⁵ Guna nuwonúwana ataligei. Kai ima talavaitayana moe Guyau mainina dedevina nakae, e Yaubada ivauyaone go, avatauwa neta iiyavedi o avatauwa neta siivailai, liliudikova sinove. ¹⁶ Emainayana kidi siivailai sinove, moe ámasa mainina kaka nakae o tadigo kada, 'Bei sikámasa.' Ago kita Yaubada iiyaveda tanove, moe yawana vata kaka mainina nakae o tadigo kada, 'Yawoida vata tababane.' Go moe paise-wayana Guyau Valena manuna avatau itoboine iguinuwe? Kaai go! ¹⁷ Moitamo. Maniyedi totalavaita polapola madi váobuna Yaubada ina livala sitaalavaite. Go kai amo tauyadi nakae geya, go sem kai geya ima polamo kataalavaita. Kai ima spwagógana Guyau taiyao pasina katalavaita go, moe paise-wayana Yaubada ikawoima bei matana goi katalavaita.

3

Da Korinta Paulo ana leta aba kamoitamo nakae

¹ Manakae? Konuwonúwana bego ima livala goi aiyuwoina toinima kakamoitamoema komi yaimi bego kouyaonema? Kai geya ituli ta boda maniyedi nakae. Kidi itoboine adi leta sivinimi bego ikamoitamoedi yaimi, e kouyaonedi ae? Go kai moe nakae geya. Aiyuwoina geya itoboineyeta ama leta kogini bego ituli ta boda yaidi goi kokamoitamoema bego siuyaonema. Moe nakae geya ² unana komi ama leta aba

kamoitamo, bei komi goi tomota siuyaonema. Letayana atema goi ikaaiyaka bei tomota liliudi itoboinedi sikatuyaivi siyagoima o tadigo kada, 'Imi sinapu sigite, ima paisewa siyagoi dedevina.' ³ Bogina imavada bego komi leta tayamo nakae Guyau igini kai ima paisewa dedevina yaimi goi manuna go, kai tomota kavinidi. Ago geya kada bairo goi igini geya. Moe bei itagau. Go sem Yaubada maa yawoina Balomaina goi igini. Geya gurewa paaevaidi goi igini nakae Mosese iguinuwe geya,^{†a} go sem tomota atedi goi igini.^{†b}

⁴ E itoboinema ima spwagógana Guyau taiyao goi mama numisa Yaubada yaina ima paisewayana nakae kadige yaimi. ⁵ Geya itoboinemeta kapásima kama,

'Ame paisewayana toinima ima togaga goi kaguuinuwe.'

Go sem moe Yaubada ina togaga goi kaguuinuwe. ⁶ Tauyana nakae ikitogagama bei kai ina tokabivalavalayao ina kanasiuna vau manuna.[†] Ina kanasiunayana geya kada tomota idi ginina goi nakae Mosese boi Yaubada ina Katukeda ana lovina iginidi geya, go sem Baloma Kimaasabaina goi. Mosese ina gininayana moe ámasa unana go, Baloma Kimaasabaina moe yawana vau unana.

*Baloma Kimaasabaina
ina kenao dedevina toina*

⁷ E Yaubada ina Katukeda gurewa paaevaidi goi Mosese iginidi namliyeta koya goi

^{†a} 3:3 Tat 24:12. ^{†b} 3:3 Yer 31:33; Isi 11:19, 36:26. † 3:6 Yer 31:31; Luk 2:20.

isou go, maisina goi Yaubada ana káeyana tomoeyalina ininínima. Tauna tomoeyalayana pasina Isileli tubunao geya itoboinedita Mosese maisinayana sipote. Ego amo tomoeyalayana Yaubada iitauwe. Atukedayana moe ámasa ina kenao go, Yaubada ina togaga ana káeyana ana vagitákwana taiyao sisowóduwo.† ⁸ Ago Baloma Kimaasabaina ina kenao goi Yaubada ina togaga ana káeyana ana vagitákwana ivakaigaga, e moe enaoyana Atukeda idedevinasave. ⁹ Moe moitamo. Atukedayana Mosese boi ivatuu-lukoida dedevina, nakae Yaubada ina togaga ana káeyana ana vagitákwana tagite go, Atukedayana goi takínona tababane ida goyo pasidi. Go Yaubada mana nuwotao ikivavaseda kita tokibóbwata ina kanasiuna goi. Moe enaoyana goi ina togaga ana káeyana ana vagitákwana ivakaigaga toina tagite ae? ¹⁰ Moitamo. Boi Yaubada ina kanasiuna bogo goi ina togaga ana káeyana ivagitakoe go, ame tuta ana kaigigita daakakaina unana togaga ana káeyana ana vagitakwanayana ina kanasiuna vau goi bogina gagaina toina. Tauna ina kanasiuna bogo ikalisave. ¹¹ Bogina koyagoi. Anasiuna bogoyana daakakaina go, boi anasiunayana goi Yaubada ina togaga ana káeyana ana vagitákwana ikaaiyaka. Anasiuna vauyana ikaiyako vata, tauna Yaubada ina togaga ana káeyana ana vagitákwana ivakaigaga toina.

¹² E moe kalootutae, tuwo mama katepatu kakamamaétala Vala Dedevena manuna. ¹³ Go geya kada Mosese nakae geya. Boi maisina

† 3:7 Tat 34:29.

ana taboda iyato, e bei Isileli tubunao geya itoboinedita Mosese maisina sipotevatae ana kadókana Yaubada ina kanasiuna bogo ina masi toina isowóduwo,† 14 go sem dabadi sikasa. Moitamo. Boi nimatu ima ame tuta Yaubada ina kanasiuna bogo sikaatuyaivi go, tayamo taboda Mosese ina tabodayana nakae nava ikaaiyaka yaidi nuwodi itaabodedi. Tabodayana ikaaiyaka unana ida spwagógana Guyau taiyao pasina tauna bei itauwe go, kidi geya sinumiseyeta, tauna geya itauweyeta. 15 Go sem boi nimatu go, ima ame tuta neta Yaubada ina Katukeda boi Mosese ivinivini sikatuyaivi, tabodayana nava Diyuu nuwodi itaabodedi. 16 Go avatauwa neta situgavila bei Tomoya sinoko,‡ e tabodayana itauwe.† 17 Ego Yauweyana kina moe Baloma Kimaasabaina go, avatauwa yaida neta Balomaina ikaaiyaka, e kita taliigavida. 18 E kita madabokida maisida geya ana tabodamo, e maisidayadi saribu nakae goi Yauwe ana káeyana kanukanununa tagite go, Tauyana giyaina giyaina ikaigaavileda toinina ana tapata nakae tutayana ana káeyana tagite tonumisa tamo tamo goi. Moe Yauwe ina guinuwa; Tauyana moe Baloma Kimaasabaina.

† **3:13** Tat 34:33. ‡ **3:16** Tomoya sinoko: Tomoya ana yagoina aiyuwo ameko. Nakona Yauwe go, aiyuwoina Yeisu. Tutayana Paulo kana, ‘Tomoya sinoko’, nakona Tateta 5:22, 32:31 be Atukeda 4:30 italavaitedi. Amo tomwanayadi silatuwokoida nava bei tomota Yauwe sinoko. E nakona Paulo ina nuwonúwana bego talavaitayana Atukeda 4:30 goi bei imalatomota tutayana tomota Yeisu sinoko. † **3:16** Tat 34:34.

4

Paulo kidi idi paisewa dedevina

¹ Moe pasina nukotoma geya itopeta unana ame ama kawoi Yaubada ina nuwokapisi goi inumisema ivinima kaguunuwe, tauna nukotoma geya itopeta. ² Go sem guinuwigau be guinuwa aba omayamaya kakataedi. Nakae pola o Yaubada ina livala ana sobala geya, go sem tomota matadi goi kabóbwara moitamó, e bei tomota liliumi matami goi kakamoitamóema bei koyagoima Yaubada matana goi ima guinuwa dedevina. ³ E nakona tomota maniyedi Vala Dedevena kataalavaite geya siyagoiyeta go, moe kidi vailai ana kenao goi sinonoina aditava nuwodi ma taabodaidi geya siyagoiyeta. ⁴ Amo tauyadi geya sinumiseta. Poyapoya ame ina yaubada nuwodi ivapatudi, e mavada Vala Dedevena goi geya sigiteyeta. Vala Dedevenayana ame manuna: Guyau moe Yaubada ina togaga ana káeyana, Tauyana Yaubada ana tapata. ⁵ Moitamó. Moe toinima yoima geya katalavaiteyeta geya, go sem Yeisu Guyau katalavaite bego Tauyana Tomoya go, aiyuwoina bego kai komi imi pakonayao Yeisu pasina ⁶ unana Yaubada kina idigo kana,

‘Mamaníwana goi mavada bei itapasigi.’†

Tauna moe Tauyana nakae nuwoma itapasigidi, e bei itoboinema ina togaga ana káeyana kayagoi; aeyanayana Yeisu Guyau maisina goi itapasígina.

† 4:6 Abv 1:3; Ais 9:2.

Paulo ina neneta goi Yaubada ina togaga isowóduwo

⁷ E Vala Dedevinayana ana mavada esaesa nakae kai sakavaima neenetaidi vaega nakae sinaema goi ikaaiyaka. Ikaiyaka bego tomota siyagoi togagayana yaima goi moe Yaubada ina togaga gagaina toina go, geya kai ima togaga geya. ⁸ Ame nakae: Mou liliudi kababani go, togagayana pasina mama kaba siya. Tuta maniyena geya kayagoyeta bei manakaema kaguinuwe go, luluma geya sitameyeta. ⁹ Tomota siyogedegedema go, Yaubada geya ikalavemeta. Madi láuwo sivatupuwema go, geya sikau-matemeta. ¹⁰ Tuta liliuna Yeisu ina kámasa wowoma goi kaalotowo bego Yeisu yawoina nakae wowoma goi ivagitakoe. ¹¹ Moe moitamo. Kai maa yawoima tuta liliuna tomota siyooisima be Yeisu pasina sitaagonema ámasa yaina. Moe nakae bego Yeisu yawoina wowoma kaavavaidi goi nakae kavagitakoe. ¹² Tauna ámasa kai yaima goi ipaaisewa go, yawana vata yaimi goi ipaaisewa o tadigo kada, ‘Kai Yeisu ina vamoleyenayao gedageda kabaabani bego komi yawoimi vata kobabane.’ ¹³ E kai togínina tayamo Gínina Kimaasabaina goi nakae igini kana,

‘Anumisa, tauna nakae atalavaita.’

Same 116:10

Amo tauyana ina numisa unana moe Baloma Kimaasabaina, e kai ima numisa nakae. Tuwo kanumisa, tauna kai nakae Vala Dedevena

kataalavaite ¹⁴ unana kayagoi bego kina Yaubada ida Tomoya Yeisu ámasa goi ikaitáoe, tauna kai nakae ámasa goi Yeisu taiyao bei ikaitaoema, komi taiyao toinina matana goi ivataoeda. ¹⁵ Bogina koyagoi. Gedagedayadi liliudi moe komi manumi bego Yaubada ina kanuwóiya ibibíbina tomota badabadaidi yaidi; anuwoiyayana bei tomota idi kauyagu ivaituwe. Moe Yaubada ana taimámina manuna.

¹⁶ Tauna nukotoma geya itopeta, go sem nakona wowoda sidaudáura go, maliyalina tamo tamo nuwoda Yaubada iyoolimedi. ¹⁷ Ima nuwonúwana bego ima mou ame tuta moe kaakapudi be nakae tuta kaakupina goi kalootowoidi go, sikatubayasima bei Yaubada ana káeyana tomoeeyalina vaatayaina kalotowo. Ame mouyadi idedevinasavedi ¹⁸ unana kai geya kanuwonuwoneta dogoi taagitedi manudi, go sem dogoi geya taagitedi manudi kanuwonúwana. Dogoiyadi taagitedi, tuta kaakupina kaka goi sikaaiyaka, e sisáwala go, dogoiyadi geya taagitedi sikaiyako vata.

5

¹ Guna nuwonúwana ataligei: Bogina tayagoi wowoda moe poyapoya wowonina yoyou nakae bei tuta kaakupina sikaaiyaka. Go neta sitauwe, wowoda vau Yaubada goi bei tababane. Wowoda vauyadi geya kada vada nakae tomota nimadi goi siiyowóidi geya, go sem ame wowoda vauyadi yábana goi sikaiyako vata. ² Moe moitamo. Ame tuta wowoda ame goi takaaiyaka go, takalayawoi unana takatukúwana bego

yábana wowonina vau kwama nakae takote. ³ Ago nakona ámasa goi wowoda bogo ame kwama nakae tavalilividi go, tuwo Yaubada bei geya ibabanedeta ma paawakuda geya o tadigo kada, ‘Geya wowodamo.’ ⁴ U, kita ame tuta wowoda yoyou nakae goi takaaiyaka, tauna ida mou gagaidi pasidi takalayawoi go, geya latuwoda wowodayadi kwama bogo nakae tavalilividi, go sem latuwoda kwama bogo ada kwama vau goi talositaoidi bego kaga kaavavaidi ivalili yawoida vau goi. ⁵ E Tauyana wowoda vauyadi manudi ikatubayasida moe Yaubada. Tauyana aba kinana ivinida bei tayagoi nava wowoda vau tababantedi; ida kaba kinanayana moe Balomaina.

⁶ Tauna tuta liliuna takaatepatu. Bogina tayagoi bego tutayana ida vada wowoda goi takaaiyaka, e Tomoya taiyao geya takaiyaketa go, tuwo maada katepatu. ⁷ Moitamó. Ame tuta Tomoya geya tagiteyeta go, tuwo matada goi geya taketoiyeta, go sem ida numisa Tomoyayana yaina goi taaketoiya. ⁸ E takatepatu go, latuwoda wowoda ame takalave, e Tomoya ina dadava goi taiyao takaiyaka. ⁹ Tauna nakona ida vada wowoda goi takaiyaka o takalave go, ida nuwonúwana gagaina bego Yaubada tavauyaone. ¹⁰ Itoboineda tavauyaone unana madabokida Guyau ina kaba takínona goi bei tataoya be kita tamo tamo nakonakae wowoda goi boi bogina taguinuwedi, neta dedevina o igoyo, e nakae guinuwayadi bei imapudi. Tauna tapoikikina bego Tauyana tavauyaone.†

† 5:10 Rom 14:10.

*Paulo latuwona da Korinta aedididi
sisamolai tauyana manuna*

¹¹ Tauna, ida Tomoya ina mapuyana pasina ana matoita wowooinina bogina kayagoi, tauna tomota katamyabidi bego Yaubada sinoko. E kai Yaubada bogina iyagoima. Go alotuta bego komi nakae koyagoima. ¹² Geya kada aiyuwoina kakamoitamoma yaimi goi geya, go sem leta ame goi kalatuuwokoimi kaga unana itoboinemi manuma aedidimi kosamolai. Latuwoma bego itoboinemi ama toromgiyao kokatumapudi. Toromgiyaoyadi sigágasa toinidi adi kaigigita manuna go, aderidi manuna geya sinuwonuwoneta. ¹³ Imi samolaiyana itoboine. Kogita. Ama toromgiyao ima poisógana, ima bóbwara be ima sinapu sigitedi kadi, ‘Kidi Paulo adi kaigigita siyaluwo.’ Moe manuna geya kanuwonuwoneta unana ima poisoganayana atema goi moe Yaubada umana. O neta maniyedi sigitema kadi, ‘Kidi Paulo ma buluubuludi’, moe manuna nakae geya kanuwonuwoneta unana ima poisoganayana atema goi moe komi ami vaita manuna. ¹⁴ Moe itoboine. Ima poisoganayana unana Guyau ina matakoi ikalimonema. Ina matakoiyana manuna ame bogina kakinane: Bego koroto tayamo ikámasa tomota liliuda manuda, kita ada katumapu, tauna ana kaigigita madabokida takámasa. ¹⁵ Moe liliuda manuda ikámasa bego kita maa yawoida geya tuwaina takaaiyaka toinida manuda, go sem Tauyana ikámasa be nakae itaoyamna manuda, e moe Tauyana umana takaaiyaka.

*Paulo kidi sipaisewa Yaubada taiyao
tomota idi kabivekovekomna manuna*

¹⁶ Tauna Tauyana ina kámasa pasina ame tuta ima sinapu ituli. Ame tuta be nakae tuta simamaima kai geya vatau tayaamo ana kaigigita goi bei kadovatusiye nakae da poyapoya siguinuwe. Boi mainao nava Guyau geya kayagoiyeta moe nakae Tauyana kadovatusiye bego Tauyana tomota besobeso go, ame tuta ima nuwonúwana ituli Tauyana manuna. Tauyana kayagoi Guyau. ¹⁷ Aiyuwoina Guyau ikámasa liliuda manuda, tauna avatauwa neta spwag-oogonidi Guyauyana taiyao, e simalatomotavau. Sinapu bogo bogina isáwala go, konöve, sinapu vau bogina isowóduwo!

¹⁸ E moe dogoiyadi aivaudi liliudi Yaubada iguuiuwwedi. Tauyana Guyau ina guinuwa goi ikabivekovekomneima go, abivekovekom-nayana ana talavaita bogina ikawoima kaguinuwe. ¹⁹ Moe nakae Yaubada Guyau ina guinuwa goi da poyapoya ikabivekoveekomneida toinina umana, ida kapipilova geya ituuyouyoidita go, inumisema abivekovekomna valena katalavaite. ²⁰ Tauna kai kina Guyau ana katumapuyao, e sopama goi Yaubada ina kawanoi itaalavaite. Tauna kai Guyau manuna kakawanoi maki-maki tomota yaidi kama, 'Kotagõna Yaubada ikabivekovekomneimi.' ²¹ Guyauyana goyo geya ilotowoeta go, kita manuda Yaubada ivayoko kina ada kimavada ana vininabeso bego kai ima spwagógana Tauyana taiyao pasina Yaubada ina kibóbwata ana kanasíuna manuna kakai-

woduwe.†

6

¹ E Tauyana taiyao kaapaisewa, tauna nakae kakawanoi makimaki ina kanuwóiya kouyaōne go, anuwoiyayana kotagōne yawoimi goi ikeuwoe. ² Moitamō. Yaubadayana idigo kana,

‘Tuta ana toboine goi anovem, e akatumapu;
nakae am yava ana maliyalina goi ao avaitem.’
Aiseya 49:8

Konōve! Ame tuta moe tuta ana toboineyana.
Konōve! Ame moe ami yava ana maliyalinayana.

³ Geya kada tayaamo aba kapusi tomota idi numisa goi kayato geya, govila bei tomota itoboinedi ima paisewayana sitagiwoi. ⁴ Go sem kakamoitamōema kai Yaubada ina tovaitayao, tauna dogoi liliudi goi toinima kavagitakoima yaimi be itoboinemi konumisema go, dogoiyadi liliudi goi kamesayágana gagaina. Dogoiyadi ame nakae: Ima mou goi, o ima gedageda goi, o ima kaiyakomou goi, ⁵ o ama láuwo goi, o ima tuta deri goi, o ama vakaleya goi, o ima poisógana gagaina goi, o nakae geya kamasiisi dókana, o ima loga goi. Go madabokidi goi mama togaga.† ⁶ Tuwaina ima paisewayana goi mama sinapu maavadaina, mama nanamsa, mama mesayágana, mama yabobona, mama kaiguyau, Baloma Kimaasabaina goi,

† 5:21 Abv 15:6; Rom 1:17, 10:3; Pil 3:9. † 6:5 Gui 16:23.

mama matakoi mooitamoina, ⁷ mama bóbwara mooitamoina be nakae Yaubada ina togaga goi. Tuwaina ima paisewayana kaguinuwe ame nakae: Mama kaipíyama nimakakataima be nimakekelima goi. Ima kaipiyamayadi moe Yaubada ina kibóbwata ina kanasíuna manuna. ⁸ Tuwaina tomota maniyedi sitaimaminema go, maniyedi sikisobuyema. Maniyedi sikaogoy-oema go, maniyedi sikaodedevinema. Ima paisewa goi nakona tomota siwowokoima bego kai tovasuláiga go, kai kabóbwara moitamó. ⁹ Nakona geya yoimamo tomota maniyedi yaidi go, maniyedi yaidi kai maa yoima. Nakona ámasa ivakaosima go, konove, nava maa ya-woima. Nakona dábina kababane go, geya kakamasetá. ¹⁰ E nakona mama nuwomou go, tuta liliuna kaauyáwana. E nakona katokai go, esaesa mooitamoina kakaiguyauye tomota badabadaidi yaidi. E nakona poyapoya ame goi kai geya konamamo go, yábana konanina liliudi sikaaiyaka yaima.

Paulo ina kawanoi bego da Korinta siuyaone

¹¹ Geya kada giyaiina ima nuwonúwana kavagagale yaimi geya, go sem madabokiina kalumavivisi yaimi! Komi da Korinta, atema madabokina goi ima matakoi bogina kakaiwoduwe yaimi! ¹² E kai ima matakoi geya kavagagalakoimita go, komi imi matakoi kovagagaalekoima. ¹³ E ima matakoi nakae kokatumāpu, e atemi goi komatakoiyēma. Ame nakae komi natugowo, tauna alatuwokoimi.

14 Taabu tauyadi geya sinuumiseta taiyao koospwagōgana. Moe moitamō. Manakae? Kibóbwata be apipilova itoboinedi sispwagōgana? Geya. Manakae? Mavada itoboine mamaniwana taiyao sikabivekoveko? Geya. 15 E manakae? Guyau be Beliyala‡ itoboinedi taiyao sieboda tayamo? Geya. Manakae? Kita tonumisa be kidi geya sinumiseta ida nuwonúwana sivavasa? Geya. 16 E manakae? Yaubada polapola itoboinedi Yaubada mooitamoina ina Vada Kimaasabaina goi sikaaiyaka? Geya ae? Moe moitamō. Kita Yaubada maa yawoina ina Vada Kimaasabaina, yaida goi ikaaiyaka, tauna taabu yaubada polapola taiyao taaebōda tayamo.†^a Moe nakae Tauyana idige kana,

‘Yaidi goi bei akaaiyaka
be nakae yaidi goi aaketoiya.
Yau bei idi Yaubada go,
kidi yau guna bodao.’†^b

Vininabeso 26:11-12

17 Tauna kana,

‘ “Tauyadi geya sinumiseguta yaidi goi
kosowōduwo;
taabu dogoi baailidi kobisiikonēdi, e bei
auyaonemi”,
Yauwe kaena.’

‡ **6:15** Beliyala: Ame Kaleya yoina tayamo nakae go, ana yagoina moe geya basabasainamo. †^a **6:16** Rom 8:9; 1Ko 3:16, 6:19; Epe 2:21-22; Ibe 3:6. †^b **6:16** Isi 37:26-27; Yer 32:38; Nuw 21:3.

Aiseya 52:11

18 Nakae kana,

‘ “Yau bei komi Tamami† go,
komi yau natugowo koroto be vevina”,
Yauwe Tokalika kaena.’

2 Samwera 7:14

Tauna taabu tauyadi geya sinuumiseta taiyao
koospwagōgana!

7

1 Tauna moe Yaubada ina katotulayadi bogina
ivinida, tuwo guna kaloyao, kaga liliuna wowoda
be balomaida ikibaibaailidi goi takimavadēda
go, mada matoita wowooinina Yaubada yaina
takimasabedokōida Tauyana umana.

Paulo ina uyáwana

2 Ateni goi kouyaonēma! Geya vatau tayaamo
yaimi goi kabagali. Geya vatau tayaamo yaimi
goi kavasulaigi. Geya vatau tayaamo yaimi
goi kavaobu. 3 Moe nakae tomota maniyedi
yaimi bogina siwowokoigu go, mae nakae bogina
alatuwokoimi geya kada atakinoimi bego komi
toogoyoimi geya. Boi bogina alatuwokoimi bego
komi atema, tuwo taiyao takámasa o taiyao
maa yawoida. 4 Magu katepatu gagaina bego
itoboinegu abóbwara moitamō yaimi. Komi
manumi aedidigu asamolai gagaina. Bogina
kokipaiwolegu gagaina. Ima mou liliudi goi
uyáwana bogina ivakayaodeigu. 5 Moe moitamō.

† 6:18 1Te 17:13.

Boi kana Mesadoniya go, sakava ana dadava goi geya itoboinemeta kawaiwasi, go sem ima guinuwa liliuna goi mou kababantedi, nakae au-makimaki tomota taiyao go, sinaema goi matoita kalotowo.† ⁶ Mouyadi kalotowoidi go, Yaubada kina tonuwomou adi Tokipáiwala ikipaiwolema tutayana Taito isowóduwo yaima goi. ⁷ Ego geya ina sowóduwo kaka goi ikipaiwolema geya, go sem kanove tauyana nakae kokipaiwole. Ama kipaiwalayana unana tauyana ima valemi ita-lavaite yaima kana,

‘Da Korinta latuwodi sigitemneim, idi bágala yaim pasidi sinuwomou be nakae kom manum sipoisógana.’

Moe livalayana anove, tauna tuwaina auyáwana gagaina. ⁸ Guna uyawanayana unana ame: Nakona boi guna leta pasina nuwomi imou go, tuwo letayana manuna geya avakuwoneta. Moitamo mainao avakúwana. Boi mainao agite letayana pasina nuwomi imou go, moe tuta kaakupina goi. ⁹ E mainao avakúwana go, ame tuta auyáwana. Go geya kada auyáwana bego nuwomi imou geya, go sem bego imi nuwomou pasina kotugavila. Moitamo. Moe nuwomouyana Yaubada latuwona kolotowo bego geya tayaamo kaga itagau yaimi boi kai ima leta kasakasaina pasina. ¹⁰ Nuwomou Yaubada latuwona moe dedevina. Nuwomouyana pasina tatugavila bei ada yava tababane. Go ada yavayana manuna geya tavakuwoneta. Ego nuwomou da poyapoya silotowo goi ámasa sibabane unana idi goyo goi geya situgavileta.

† 7:5 2Ko 2:13.

¹¹ Moitamo. Kogita? Imi nuwomouyana nakae Yaubada latuwona go, nuwomou ina guinuwa yaimi goi kopoisógana bego kokabikaonegu. Go poisógana kaka geya, go sem toinimi kotasigimi. Go tasígina kaka geya, go sem tauyana ina goyo manuna koegamogamogu. Go egamogamogu kaka geya, go sem komatoita. Go matoita kaka geya, go sem kokatukuwonegu. Go atukúwana kaka geya, go sem lulumi ilíbwata manugu. Go líbwata kaka geya, go sem mami salau tauyana ina goyo koliune. Kaga liliuna goi bogina kovagitakoimi bego tauyana ina goyo manuna komi geya ami pikwanamo. ¹² Tauna leta kasakasaina moitamo agini aetune iwo go, geya kada tobagalayana pasina o siyana iibagali pasina geya, go sem agini bego Yaubada matana goi itoboinemi koyagoi atemi iyoi kai manuma. ¹³ Tauna Taito ina talavaitayana pasina atema ipatu.

E atema ipatu go, tuwaina isowóduwo. Tauyana ima ilatuwokoima boi komi madabokimi yawoina kolisi. Tauna kina ina uyáwana kagite, e ima uyáwana ivaituwe gagaina. ¹⁴ Unana boi komi manumi auyawana gagágasa tauyana yaina goi, e imi sinapu goi geya kogiemaemaeguta, go sem kaga liliuna katalavaite yaimi moe livala moitamo, e nakae kaga liliuna komi manumi boi kauyawana gagágasa Taitoyana yaina moe livala moitamo. ¹⁵ Aiyuwoina madabokimi imi kabikáwana inuwaisi. Nakae komi mami matoita be mami malitatátava Yaubada matana goi ana gogo yaimi. Tauna ina matakoi komi yaimi bogina ivaituwe

gagaina. ¹⁶ Auyáwana bego kaga liliuna goi itoboinegu anumisemi koguinuwedi.

Vininabeso manuna

8

(2 Korinta 8:1—9:15)

Da Korinta idi vininabeso ana lamgógana

¹ E latuwoma kalatuwokoimi, semao, Yaubada ina kanuwóiya myana manuna. Anuwoiyayana boi ana totugugunayao Mesadoniya goi ivinidi.†

² Ame nakae: Adi vakakona ana mou gagaina goi kidi siuyáwana gagaina be nakae sitokai gagaina. Ago moe dogoiyadi aiyuwo goi idi vininabeso gagaiina sikasale. ³ Idi vininabesoyana moitamó gagaina. Itoboinegu akamoitamó bego kidi nakonakae itoboinedi, e madi tagona sivininabeso go, idi vininabesoyana mana vaituwo sikatukowosi. ⁴ Ego sikawanoi makimaki yaima kadi,

‘Kokanuwoiyema be vininabesoyana ana lamgógana manuna kasiukoimi, e Yaubada ina kimasabayao Yerusalemá goi kavaitedi.’

⁵ Idi vininabesoyana moe gagaina toina go, geya nakae kanuwonúwana bei sivinima, go sem mainao toinidi sikasaledi ida Tomoya yaina namliyeta kai yaima sikasaledi nakae Yaubada latuwona. ⁶ Tuwo Taito kakatuliwole kadigo kama,

‘Da Korinta idi kanuwóiya, moe idi vininabeso, boi bogina kuvatowo yaidi, e nakae kuvaitēdi idi vininabesoyana ana lamgógana silukavave.’

† 8:1 Rom 15:26.

⁷ Boi dogoi liliudi komi koguinuwedokoidi. Nakae numisa, bóbwara, nanamsa, poisógana madabokina, matakoi boi kabagulidi yaimi.‡ Tuwo ame anuwoiyayana vininabeso manuna nakae latuwoma koguinuwedōko.

⁸ Geya kada Yaubada ina lovina avinimi geya, go sem ituli ta tomotava idi poisógana idi vininabeso manudi alatuwokoimi gobe adovatusimi neta komi nakae imi matakoi moitamō gea geya.

⁹ Imi vininabeso itoboine. Ida Tomoya Yeisu Guyau ada kaba gita. Ina kanuwóiya bogina tayagoi bego Tauyana boi mainao toesaesa go, kita manuda ietokai bego kita amo Tauyana ina tokaiyana goi bei taesaesa.

¹⁰ Yau guna nuwonúwana vininabeso ana lamgógana manuna avinimi. Moe ami dedevina manuna unana komi tauyami boi tala mlida bogina kovatowo imi vininabeso kogimilamgogo go, aiyuwoina komi kogimiyala bego nakae koguinuwe.

¹¹ E ame tuta imi vininabesoyana ana lamgógana ami toboine goi nakae kolukavāve, e bei imi katetagona tutayana kogimiyala be imi katetagona tutayana kolukavave bei sivavasa.

¹² Kaga neta ada toboine goi tavininabeso, neta mada katetagona tavininabeso, Yaubada bei iuyaone. Tauna Tauyana latuwona nakonakae yoiyada, e moe tavinibeso.

¹³ Guna nuwonúwana ataligei. Geya latuwogu bego komi imi vininabeso gagaina pasina ituli ta tomotava idi kaiyaka idedevina go, komi kokaiyakomou. Moe nakae geya, go sem latuwogu komi be kidi kovavasa.

‡ **8:7** Matakoi boi kabagulidi yaimi: Boi buki ana tokaidámana ame sikaidamane kadi, 'Imi matakoi yaima goi.'

14 Tuta ame goi komi mami esaesa itoboinemi amo tauyadi idi kaiyakomou manuna kovaitedi. Moe bego tutayana komi kokaiyako mou, kidi madi esaesa itoboinedi sivaitemi, e bei komi be kidi kovavasa. 15 Moe idi vavasayana ana kaba gita Gínina Kimaasabaina ina livala goi tagite, kana,

‘Avatau neta iseo badabada, ikanisave; geya tayaamo ikesa. Avatau neta ivakakayuwomo, nakae ikáika gamona.’

Tateta 16:18

*Paulo Taito ma senao
madi yapali ietunedi sina Korinta*

16 Akauyagu Yaubada yaina unana Tauyana bogina Taito nukotona isanayato bei ina poisógana komi ami vaita manuna kai ima poisógana nakae komi yaimi. 17 Nakae boi kakawanoi tauyana yaina bego iwo, e ima kawanoiyana iuyaone go, tuwaina mana poisógana toinina ina nuwonúwana goi bogina ikatubayasi bego iwo. 18 E tonumisa tayamo Taito taiyao kaetunedi siwo. Tonumisayana kidi Yaubada ana totugugunayao liliudi siyaapaliye ina paisewa Vala Dedevena manuna. 19 E moe go, aiyuwaina totugugunayaoyadi sikinave bego ivakitauma tutayana imi vininabesoyana kanave Yerusalema goi. Amo vininabesoyana ana kavala kamataakavate ida Tomoya‡ yoina ana taimámina manuna be nakae koyagoi mama salau latuwoma kavaitemi. 20 Moe

‡ 8:19 Ida Tomoya: Ame Yaubada yoina Yauwe o nakona Yeisu idigedige.

nakae bei kaguinuwe bego geya kada tayaamo tomota itoboine itagiwoima vininabesoyana gagaina nimana goi ana matakavata manuna. ²¹ Moitamo. Latuwoma kaguinuwa dókana geya kada Yauwe matana kaka goi geya, go sem nakae tomota matadi goi.†

²² E siyada tayamo tuwaina kidi Taito taiyao bei kaetunedi siwo. Tuta badabadaina tauyana ina sinapu liliuna kadovatusiye, e bogina kayagoi mana poisógana Yaubada ina paisewa iguinuwedi. Ego ame tuta mana poisógana gagaina latuwona iwo unana inumisemi bego vininabesoyana goi kovaita. ²³ Taito kina neta neta tomota silumadade, kolatuwokoidi kami,

‘Tauyana Paulo ina tosavaiyuwo nakae taiyao sipaaisewa kita manuda.’

Go kidi sedao adi taiyuwokova neta tomota latuwodi siyagoidi, kolatuwokoidi kami,

‘Tauyadi Yaubada ana totugugunayao idi vamoleyanayao idi guinuwa goi moe Guyau ana kaba taimámina.’

²⁴ Tauna Yaubada ana totugugunayao matadi goi imi matakoi kovagitakōe korotoyadi yaidi be nakae kovatulukōidi ima uyawana gagágasa komi manumi be imi matakoi moe sivavasa.

9

Vininabeso ana sinapu manuna

¹ Guna nuwonuwanayana tuwaina ataligei. Imi vaita Yaubada ina kimasabayao Yerusalema goi manudi geya kada kaga tuwaina itoboinegu alatuwokoimi geya, unana bogina koyagoi. ² Imi

† 8:21 Abi 3:4.

yala adi vaita manuna bogina ayagoi; man-
umi auyawana gagágasa kidi tonumisa ameko
Mesadoniya goi yaidi kagu,

‘Tauyadi Akeya parovinsi boi tala mlida goi
idi vininabeso bogina sikatubayasi.’

Tuwo imi yalayana valena tonumisa Mesadoniya
goi sinove, e badabadaidi ikeyabedi latuwodi
toina idi vininabeso goi sivaita. ³ Ego sedao
adi taito bei aetunedi siwo bego imi vinin-
abeso ana lamgógana goi sivaitemi, govila bei
guna uyawana gagágasa imi vininabesoyana
manuna moe dogoi besobeso. Tuwo bei ae-
tunedi siwo bego komi imi vininabeso bogina
kokatubayasi nakae da Mesadoniya bogina alatu-
uwokoidi. ⁴ Latuwogu ayagoi komi bogina
kokatubayasi, govila bei kidi da Mesadoniya
maniyedi neta yau taiyao kao go, kababanemi
geya kokatubayasita, e kai oma imayamaya
ima uyawana gagagasayana pasina. Go kai
ametava geya, go sem komi nakae bei omi
imayamaya gagaina. ⁵ Tauna anuwonúwana
itoboine sedao akatuliwoledi bego sivaikungo
siwo yaimi, bei imi vininabeso gagaina boi
mainao kogimikaatotule manuna sivaitemi imi
vininabeso kolamgogo. Niga avámliya ao
moe imi vininabeso bogina kolukavave. Neta
nakae koguinuwe, imi vininabesoyana gagaina
ana kaigigita moe mami yabobona kovinin-
abeso. Go neta guna sowóduwo kotuyaosi
bego imi vininabeso kolamgogo, nakona tomota
maniyedi geya sikatubayasiyeta, tauna giyaina
bei sivini. Moeko goi adi kaigigita nakae kidi
tomatakónana.

⁶ E guna masi ame: Avatau neta ibaguli giyaina, idibayoyoi giyaina. Avatau neta ibaguli gagaina, idibayoyoi gagaina. ⁷ Komi tamo tamo nakonakae bogina nuwomi goi kogimilovina, e nakae kovininabēso go, geya kada nuwomou goi o lumakikina goi kovininabeso geya. Moitamo. Tovininabeso uyaaonina kina Yaubada imataakoiye. ⁸ E Yaubada itoboine anuwóiya liliudi ivaituwedi yaimi bego tuta liliuna kaga liliuna goi komi mami esaesa nakae imi esaesayadi goi itoboinemi kokaiguyauyedi tomota yaidi. ⁹ Moe nakae Gínina Kimaasabaina tokaiguyau manuna idigo kana,

‘Tkaiguyau, nakae tookaidi liliudi ivinidi.

Ina kibóbwata ikaiyako vata.’

Same 112:9

¹⁰ E Yaubada tokaiguyau tayamo. Ida vévana gagaina ikaiguyauye yaida nakae avada ivinida. Moe Tauyana itoboine imi vévana bei ivaituwedi be nakae imi kibóbwata keuwoina, moe imi kaiguyau, bei ivaituwe.† ¹¹ Yaubada nimana goi esaesa ituli ituli bei kobabantedi be itoboinemi kovininabeso gagaina. Moe vininabesoyana bei kovinima kanave tookaidi Yerusalema goi kavinidi. Moeko goi tokaidiyadi bei sikauyagu Yaubada yaina. ¹² Moe imi vininabesoyana Yaubada ina kimasabayao idi kaiyakomou ikalavaitedi go, geya kada vaita kaka geya, go sem imi vininabesoyana pasina Yaubada ana kauyagu gagaina ibabane. ¹³ Moe imi

† 9:10 Ais 55:10.

guinuwayana goi imi numisa ana kamoitamo isowóduwo. Tauna bei Yaubada ina togaga ana káeyana sikamoitamoe unana Guyau Valena Dedevena kokabikaone, kokamoitamoe be nakae komi kaaiguyaumi imi vininabeso da Yerusalemá tookaidi kovinidi be nakae ituli ta tonumisava kovinidi. ¹⁴ Go tauyadi madi kawanoi manumi sikatukuwonemi unana Yaubada ina kanuwóiya nikuunikuna ikaaiyaka yaimi, tauna imi vininabeso goi kovaítedi. ¹⁵ Takauyāgu Yaubada yaina ina yabobona manuna. Yabobonayana geya itoboinedeta tavatetelikowosi.

Paulo vamoléyana tayamo ina lovina itasigi

10

(2 Korinta 10:1—13:10)

Paulo mana lovina kapipiilovaidi iliunedi

¹ E yau Paulo magu sakululu be magu mesayágana Guyau nakae, toinigu akawanoi makimaki yaimi. Ame yau Paulo tomota maniyedi siidigegu bego matooisigu neta taiyao takaiyaka go, magu katepatu leta goi neta atumasaba. ² E akawanoi makimaki yaimi bego taabu idi pola konovenōve, govila bei ao magu katepatu abowoyimi nakae tauyadi bei abowoidi. Guna bolaguyana unana tauyadi sidigo kadi,

‘Paulo kidi sakava ana guinuwa goi siike-toiya.’

Go moe pola. ³ Ma saakavaima poyapoya ame goi kaaketoiya go, sakavaima goi geya kavayaviyeta.

⁴ Moe moitamoo. Ima yaviya ana kaipiyama geya

sakava aipiyamina geya, go sem ima kai-piyamayadi moe toogagaidi unana Yaubada goi sima. Ima kai-piyamayadi goi ima kaleyayao idi kaba togaga katusaolidi. Nakae itoboinema tomota idi kaumakimaki kakausagugudi. ⁵ Nuwonúwana liliudi vaboda nakae ima kaleyayaoyadi si-vataoedi bego Yaubada ana yagoina sisanabode, e nakae katusaolidi. Tauyadi nuwodi liliudi to-vayaviya nakae kayoisidi bego nuwodi goi Guyau sikabikaone. ⁶ Ago bogina kayokabúbuna bego tokapipilova liliudi kaliunedi tutayana kagitemi bogina kokabikawana dókana.

⁷ Komi tomota toluyedi kaka kogitegite! Avatau neta inumisa bego moitamó tauyana Guyau ana katumapu, itoboine toinina inuwonúwana ame manuna: Bego kai nakae Guyau ana katumapuyao. ⁸ Moe moitamó. Ida Tomoya lovina bogina ivinima geya bego imi numisa kakaigoyai geya, go sem bego kakitogagemi. Tuwo neta lov-inayana manuna tuwaina auyawana gagágasa, geya aomaemaeta. ⁹ Geya latuwogu bego komi konuwonúwana yau apoikikina guna leta goi akatumatoisimi. ¹⁰ Moe nakae alatuwokoimi unana tomota maniyedi sidigo kadi,

‘Paulo ina leta kasakasaidi be toogagaidi go, neta ikaaiyaka yaida, tauyana ina bóbwara neenetaidi be aba katae.’

¹¹ Tomota amo tauyadi nakae itoboinedi sinuwonúwana ame manuna: Bego nakonakae ima bóbwara leta goi tutayana aduwanau kakaaiyaka, e ima guinuwa tutayana yaimi goi kakaaiyaka sivavasa.

¹² Moe moitamó. Manakae? Bego ima ka-

leyayao maniyedi sitaoyakukuima? Go bego kai geya ama katepatumo be kanuwonúwana bego ima kaleyayao taiyao kavavasa? Geya, go sem kidi toinidi sikaodedevinedi be nakae toinidi sikatutukoidi go, toinidi idi bágala geya siyagoiyeta. ¹³ E kai go amo nakae geya. Ama lovina goi dadava maniyedi moe kai ima kaba lovina talavaita manuna. Geya itoboinemeta ituli ta kaba lovina ana paisewa manuna kauyawana gagágasa, go sem aba lovina Yaubada bogina ivinima ana paisewa manuna itoboinema kauyawana gagágasa. Go ima kaba lovinayadi goi komi kokaaiyaka. ¹⁴ Moe moitamó. Go kaga unana? Unana boi kao Vala Dedevina katalavaite yaimi, geya kada ima kaba lovina kalovinatao geya. Neta geya kawoita, moitamó ima uyawana gagágasa geya itoboineyeta go, kai kagimiiwo yaimi Valayana Guyau manuna katalavaite. Tauna komi yau guna kaba lovina goi kokaaiyaka, e itoboinema paisewa yaimi goi manuna kauyawana gagágasa. ¹⁵ Ituli ta boda idi poisógana ta kaba lovina goi manuna geya kagagaseta. Ego tutayana imi numisa ibibíbina, kalotuta bego itoboinema imi vaita goi ima paisewa kakidedede gagaina nakae ama lovina ana tagona, ¹⁶ e bei itoboinema kakalavemi kana ituli ta dadava goi Vala Dedevina katalavaite. Ago ituli ta tomota idi kaba lovina goi idi paisewa manuna geya kagagaseta. ¹⁷ Moe nakae Gínina Kimaasabaina idige kana,

‘Avatau neta iuyawana gagágasa,

Yauwe anetava manuna iuyawana gagāgasa.†
Yeremaya 9:24

¹⁸ Moitamo. Avatauwa neta toinidi sikamoita-moedi, amo tauyadi kina ida Tomoya geya iuyaonedita, go sem avatauwa neta ida Tomoyayana ikamoitamoedi, moe tauyadi iuyaonedi.

11

Paulo ina guinuwa da Korinta manudi

¹ O neta guna livala yaaluwoidi nakae tuta giyaina goi komesayágana! Guna kaleyayao idi bóbwara yaaluwoidi goi bogina komesayágana, tauna ame tuta latuwogu yau guna bóbwara goi komesayágana. ² Bogina koyagoi. Alokatemi nakae Yaubada ilokateda. Aemi bogina apakoidi nakae koroto tonai tayamo yaina, e bei ito-boinegu komi kimaasabaimi woiyai geya ana kanaotamo nakae avagitakoimi Guyau yaina. ³ Ego amatoita nakona imi kasala mooitamoina be maavadaina Guyau yaina goi moteta bei nuwomi ivasulaigidi nakae boi nimatu ina nuwotulu goi Ivi bogina ivasulaigi.† ⁴ Maniyedi tomota bogina siwo ituli ta livala Yeisu manuna sitaalavaite yaimi go, amo livalayana boi geya katalavaiteyeta yaimi. Nakae ituli ta baloma kidi goi kokabi go, amo geya kada Baloma Kimaasabaina boi bogina kokabi Yaubada goi geya. O nakona ituli ta vala kouyaone go, amo valayana geya nakae Vala Dedevena mooitamoina bogina kouyaone nakae geya. Komi

† 10:17 1Ko 1:31. † 11:3 Abv 3:1—5:13.

manakae! Moe dogoiyadi pola go, komi komesayágana ae? ⁵ Go itoboine yau guna bóbwara goi komesayágana. Moitamo. Amo koro-toyadi bego Guyau ina vamoleyanayao toosakidi go, yau guna nuwonúwana geya sikalisaveguta geya. ⁶ E nakona moitamo yau geya bóbwara ana tokatanaki dedevina geya nakae tomota maniyedi sidigedige, go sem Guyau ana nanamsa manuna geya atamogemogeta, go sem tuta lili-una ima vatulúkwana be ima guinuwa liliudi goi kavatulukoimi bego moe kayagoidoko.

⁷ Manakae? Nakona imi nuwonúwana ituli? Boi Yaubada ina Vala Dedevena atalavaite yaimi go, geya latuwogu koemaisigu, go sem toinigu nimagu goi apaisewa. Moeko goi toinigu akisobuyegu go, manakae? Komi imi nuwonúwana bego guna kisobuyana goi goyo aguinuwe ae? Iyaa! Akisobuyegu bego akilagasimi! ⁸ Yaubada ana totugugunayao ituli ta dadava goi siemaisigu bego komi manumi apaisewa o tadigo kada, 'Idi mani avainao nakae bego avaitemi komi ami dedevina manuna.' ⁹ Boi tutayana yaimi goi akaaiyaka neta avakeposi, e imi yogala geya ayatoeta. Konuwaisi. Sedao nuumi-saidi Mesadoniya goi sima kaga avaakeposi sivinigu. Ago kaga liliuna goi apoikiki bego imi yogala geya ayatoeta go, tuta simamaima, guna sinapu bei nakae.† ¹⁰ Guyau ibóbwara moitamo, e yau nakae abóbwara moitamo bego tomota geya atagonedita sitabubuligu Yaubada ina paisewa aguinuwe manuna. Ame guin-uwayana manuna auyawana gagágasa go, geya

† 11:9 Pil 4:15-18.

vatau tayaamo Akeya ana dadava goi itoboine guna uyawana gagagasayana goi isanabodegu. ¹¹ Ame guna sinapuyana tabúbula manuna unana kaga? Unana geya amatakoiyemita? Moe nakae geya! Yaubada iyagoidokoigu! Moitamo amatakoiyemi!

¹² E guna sinapuyana yaimi ame tuta be nakae nava bei aguuinuwe. Moe bego tosakidiyadi idi pásima avakoikoi bei geya itoboinedita madi uyawana gagágasa sipásima bego idi sinapu yogala manuna yaimi goi nakae yau guna sinapu. ¹³ Moitamo. Tomota amo tauyadi nakae moe geya Yeisu ina vamoleyanayao moitamo geya. Kidi toguinuwa polapola. Kai Guyau ina vamoleyanayao sitapatema bego tomota sikatubaudi. ¹⁴ Moe manuna geya takaliwoiseta ae? Moitamo. Kaleya anerose maavadaina itapate bego ikatubauda. ¹⁵ Tauna ikakapu neta Kaleyayana ana tovaitayao toinidi sikaigaviledi bego tanuwonúwana kidi sinapu mooitamoina adi tokibobwatayao. Ago tuta ana kaba lukavava goi kidi idi goyo adi katumapu bei sibabane.

Paulo iuyawana gagágasa ina kaleyayao nakae

¹⁶ Abobwaramna. Taabu konuuwonúwana yau ayaluwo. Ego neta konuwonúwana ayaluwo, yaaluwoigu nakae agu gogo yaimi nakae kidi bego toosakidi adi gogo, bei itoboinegu tupwana auyawana gagágasa tauyadi nakae. ¹⁷ Guna livala moe geya ida Tomoya ina lovina goi ima geya, go sem moe tomota yaaluwoina nakae auyawana gagágasa. ¹⁸ Tomota

badabadaidi yaimi sakava ana dadava goi siuyawana gagágasa, tauna yau nakae bei auyawana gagágasa. ¹⁹ Moitamo. Komi bego to-nanamsa go, mami uyáwana tosakidiyadi yaalu-woidi idi bóbwara goi komesayágana ae? Tauna yau guna bóbwara goi bei komesayágana ae? ²⁰ Moitamo toina. Nakona tomota sivayokoimi komi idi pakonayao o sivaobumi o sikatu-taoimi o sinuwatue o silopadipadimi bego sigieo-maemaemi go, tuwo yaidi komesayágana ae? ²¹ U, oma go imayamaya beso; katalavaitema moitamo kai kaneneta unana geya itoboinemeta amo tauyadi idi sinapu nakae kaguinuwe yaimi ae?

E kaga goi tauyadi madi katepatu siuyawana gagágasa, yau nakae magu katepatu bei auyawana gagágasa. O yaaluwoina nakae abobóbwara! ²² Manakae? Kidi Iberiu? Yau nakae. Kidi Isileli tubunao? Yau nakae. Kidi Eberamo tubunao? Yau nakae. ²³ Manakae? Kidi bego Guyau ina tovaitayao? Yau ina tovaita moitamo toina. (Ame guna bóbwara goi nakona dabagu bogina igoyo!) Go akalisedi ame nakae: Guna poisógana Guyau manuna atogagasavedi. Deri goi akaaiyaka tuta badabadaina go, kidi geya. Agu láuwo sivavina ababantedi, geya ayagoiyeta. Tuta badabadaina giyakainava bei akámasa go, kidi geya.† ²⁴ Sivanima liuna ababane kidi Diyuu nimadi goi go, liunayadi tamo tamo moe dábina tetinain sivinigu.† ²⁵ Sivato alova dilidilina goi da Roma idi tovaryaviya sidabigu.†^a Sivatayamo gurewa

† **11:23** Gui 16:23. † **11:24** Atu 25:3. †^a **11:25** Gui 16:22.

goi silauigu.†^b Sivato oga goi alokoina go, isalili. Sabamgo tayamo be maliyalina tayamo osasa goi idoiyegu. ²⁶ Guna vaníbita badabadaidi goi aba vailai badabadaidi sisowóduwo yaigu. Aba vailaiyadi nakae sákala goi, tovaináwana goi, segowo Diyuu goi,†^a Totuyoyowo goi,†^b asa goi, udódana goi, osasa goi, tonumisa polapola yaidi goi, ²⁷ guna poisógana be guna valitulítuwo goi, sabamgo badabadaidi geya amasisita, magu loga be maegu isayasaya, tuta badabadaina geya avagumo, gogou akámasa unana guna kwama geya sibadebadeta. ²⁸ Ame dogoiyadi sisowóduwo yaigu goi. Ago ame alotowo sinaegu goi: Maliyalina tamo tamo goi mou Yeisu ana totugugunayao liliumi manumi alootowoidi, e manumi anuwonúwana gagaina. ²⁹ Avatau neta ineneta, ina nenetayana yau nakae alotowo. Avatau neta siyana ivakapusiye goyo goi, tovakapusiyanana manuna yau gamogu igoyo toina.

³⁰ Neta latuwomi auyawana gagágasa tosakidiyadi nakae, e kaga neta guna neneta ivagitaakoedi, moe dogoiyana manuna bei auyawana gagágasa. ³¹ Yaubada aba yapali vata!†^a Tauyana ida Tomoya Yeisu ina Yaubada be nakae Tamana.†^b Ame Yaubadayana iyagoigu bego geya apoleta. ³² Boi Yaubada guna neneta ivatulukoigu ame nakae: Boi tolovina Aretasi ina tuta goi tolovina tayamo sobuyekoina mana

†^b **11:25** Gui 14:19. †^a **11:26** Gui 9:23. †^b **11:26** Gui 4:5.

†^a **11:31** Luk 1:68; Rom 1:25, 9:5; 2Ko 11:31; Epe 1:3; 1Pi 1:3.

†^b **11:31** Rom 15:6; 1Ko 1:3; Epe 1:3,17; 1Pi 1:3.

tovayaviyayao asa Damasiko goi siyausegu bego siyoisigu† ³³ go, segowo sivaitegu. Bayao tayamo gagaina goi asowoya, ali gurewa toluyena ana windo goi sisoilavegu asou poyapoya, e tolovinayana nimana goi magu omayamaya asiya.

12

Paulo ina kalayáusa be ana kaba kinana

¹ Guna gagasayana itoboine go, geya basaba-sainamo. Ego tuwo bokoyo alayáusa boi Tomoya‡ iivinigu be nakae ina nuwogau ikai-wooduwedi yaigu bei avatetelidi. ² Guyau ina koroto tayamo aayagoi boi tala yawou aivasi sikavava goi Yaubada ikabi itukoe. Neta wowona goi o balomaina goi itukoe, moe geya ayagoiyeta. Yaubada anetava iyagoi. E itukoe ina yábana aitonina goi.‡ ³ Neta wowona goi o balomaina goi itukoe, moe seki geya ayagoiyeta. Yaubada anetava iyagoi go, ayagoi ⁴ bego Yaubada ikabi itukoe ina dadava dedevina goi. Maeko goi livala vaatabudi inovedi; livalayadi kita tomota geya ada tagonamo tavatoidi. ⁵ Amo korotoyana manuna yau itoboinegu auyawana

† **11:32** Gui 9:23-25. ‡ **12:1** Tomoya: Da Giriki niyadi goi livala ame ana yagoina geya imavadeta. Itoboineda takaigavile kada, 'Yauwe' go, aiyuwoina ame nakona Yeisu idigedige. Aiyuwokova itoboinedi. Amo tutayana Yauwe yoina geya sivatoyeta, go sem kadi, 'Tomoya.' Go Yeisu nakae siduduwe kadi, 'Tomoya.' ‡ **12:2** Yábana aitonina: Diyuu idi nuwonúwana goi yábana ana badabada aito sikaaiyaka. Yabanayadi situko sina go, yábana aitonina moe diligaemaina toina. Maeko goi moe Yaubada ina Kaba Kaiyaka.

gagágasa go, toinigu manugu geya agagaseta, go sem guna neneta taudi manudi auyawana gagágasa. ⁶⁻⁷ Nakona latuwogu toinigu manugu auyawana gagágasa go, neta nakae, geya kada yau akayomana geya, unana moe bei yaaluwoigu. Neta yau auyawana gagágasa, moe abobóbwara moitamó. Nuwogau adi kaiwoduwoyadi kausaraidi toidi agitedi go, tuwo gágasa dogoiyadi manudi bei avakilisi, govila guna kalayausayadi pasidi yau kokilagasigu, go sem latuwogu guna sinapu kogite bei guna livala konovedi, e koyagoi yau magu lovina. Tauna Yaubada mou tayamo ivinigu, govila bei ina nuwogau adi kaiwóduwo pasidi anuwatue. Mouyana ana geda awoinu gitaina nakae neta sakavaigu iginubasi. Gitayana Kaleya ina toguinuwa nakae ima gitayana iepaisewe bego iyogedegedegu, govila bei anuwatue.

⁸ Ame guna gitayana manuna sivato akawanoimakimakiko ida Tomoya yaina bego ikabi inave ⁹ go, ilatuwokoigu idigo kana,

‘Moe tuwo. Guna kanuwóiya goi bogina yoyiam. Kom im neneta goi guna togaga avagitakoedoko.’

Tauna dogoi liliudi manudi geya agagaseta, go sem guna nenetayadi manudi magu uyáwana bei auyawana gagágasa bego tomota siyagoi Guyau ina togaga ikaaiyaka yaigu. ¹⁰ Tauna guna neneta, guna yogedageda, guna mou, guna vakaleya be nakae guna vailai Guyau manuna bei auyaaonedi. Bogina koyagoi. Tutayana yau aneneta, e moe tutayana Guyau ina togaga goi yau atogaga.

Paulo ina matakoi gagaina

¹¹ Guna gagasayana goi bogina ayaluwo! Go moe komi koloetuetunema kaguinuwe. U, moe moitamō. Boi itoboine yau kokamoita-moegu, go geya koguinuweyeta! Bogina koyagoi. Nakona yau toosobugu go, tuwo amo tauyadi bego Yeisu ina vamoleyanayaoyadi toogagaidi geya tayaamo kaga goi sitaoyakukuigu geya!

¹² Yaubada nimana goi magu mesayágana vamoléyana ana kiyakiyaya aguinuwedi yaimi goi bei komi koyagoi yau moitamō Guyau ina vamoléyana tayamo. Kiyakiyayayadi moe aba kina kainaopaidi be nakae guinuwa toogagaidi.

¹³ Kaga aguinuwe Yeisu ana totugugunayao asa liliudi goi manudi go, komi manumi geya? Seki, nakona imi yogala geya ayatoeta ae? Komi manakae! Neta ame guna goyo, e konuwotāo ae?

¹⁴ Konōve. Ame bogina ayookabúbuna bei sivatonina awokoimi go, tutayana asowóduwo imi yogala geya ayatoeta. Moe moitamō. Geya latuwogu konami, go sem latuwogu komi. Bogina koyagoi. Komi natugowo nakae. Geya itoboineyeta gogómana tamadiyao sinadiyao manudi bei sivakuma, go sem koroto ma monena natudiyao manudi sivakuma. Tauna komi geya kovakumeta yau manugu, go sem komi manumi yau avakuma. ¹⁵ E yau magu uyáwana bei atagona konagu liliudi be nakae yawoigu madabokina akasaledi manumi. Amatakoiyemi gagaina go manakae? Giyaina komatakoiyegu ae? ¹⁶ E moe nakae go, tuwo. Nakona bogina koyagoi imi yogala geya ayatoeta, go sem komi imi nuwonúwana bego yau magu nuwotulu

guna pola goi avaobumi ae? ¹⁷ Manakae? Koroto maniyedi bogina aetunedi siwo yaimi, tauyadi goi avaobumi gea geya? Geya ae? ¹⁸ Boi Taito akatuliwole iwo. Tauyana itagona go, siyada tayamo taiyao aetunedi siwo. Manakae? Taito ivaobumi gea geya? Geya ae? Manakae? Taito be yau Baloma Kimaasabaina tayamo goi kaketoiya? Tayamo ae? Manakae? Kai kiyaema tayamo? Tayamo ae?

¹⁹ Manakae? Konuwonúwana bego ima leta ame madabokina goi komi ima towowókana imi livala kataasigidi? Moe geya. Yaubada matana goi kai Guyau pasina kabobóbwara. Guna kaloyao, ima livalayadi madabokidi bego komi kakitogagemi. ²⁰ Bogina koyagoi. Amatoita bego ao, nakona imi sinapu agitebabanedi geya nakae latuwogu. Komi nakae guna sinapu sápiná bei kogitebabane geya nakae latuwomi. Guna matoitayana bego imi sinapuyadi yaimi goi nakona kokaumakimaki, kovakipikipi, koegamogamogu, amitava imi yala manudi kopoísógana, kokao-goyo, kolivalakikipatu, konuwatue be nakae kovakaleya. ²¹ Aiyuwoina guna matoitayana bei guna kaluvilamna goi nakona guna Yaubada igieomaemaegu komi matami goi. Ago nuwogu bei imou maniyemi boi kogoyo manumi go, nava kaga goyogoyoidi, masisi goyogoyoidi, sakavaimi adi vikaiya owáowana manudi geya kotugavileta. Tauna nuwogu bei imou.

13

Paulo ina katusinapu

¹ Ame awowoiwo moe bogina sivatonigu bei ao avadademi go, takínona manuna Gínina Ki-maasabaina ina vatulúkwana wowókana manuna konuwāisi. Gininayana kana,

‘Totalavaita adi taiyuwo o adi taito goi itoboinedi tomota ina wowókana tamo tamo takamoitamoedi.’†

Atukeda 19:15

Ame konuwāisi unana tutayana ao, totalavaita tobágala idi goyo bei sikamoitamoedi. ² Boi guna vadádana aiyuwoina goi tauyadi sigoyogoyo bogina akatuliwoledi, e nakae ame tuta yau aduwanau goi akaaiyaka go, aiyuwoina madabokimi akatuliwolemneimi kagu,

‘Tutayana akaluvilamna ao, togoyoidiyadi adi liuna geya atotoeta.’

³ Moe nakae bei aguinuwe unana komi kolovinaegu guna kiyakiyaya avatulukoimi bego moitamo yau sopagu goi Guyau ibobóbwara. Tauna bei ao liunayana goi moe avatulukoimi. Ame Guyauyana sopagu goi ibobóbwara ina guinuwa komi yaimi geya ineneteta geya, go sem nauyayanaimi goi itogaga. ⁴ Moe moitamo. Guyauyana tomota neenetaina nakae situpatuko go, tuwo Yaubada ina togaga goi maa yawoina ikaaiyaka ame tuta. Kai ima spwagógana Tauyana taiyao goi nakae kaneneta go, ima guinuwa yaimi goi bei ame nakae: Yaubada ina togaga pasina Guyau taiyao bei kakaaiyaka.

⁵ Komi toinimi kovakakonēmi bei kogite, imi

† 13:1 Mad 18:16; 1Ti 5:19.

numisa ana ketoiya nakae Guyau latuwona gea geya? Toinimi kodovatusimi. Manakae? Geya koyagoimita bego Yeisu Guyau yaimi goi ikaaiyaka? O nakona bogina kodovatusimi go, bogina kogite Yeisu yaimi goi geya ikaiyaketa! ⁶ E kanumisa bego imi dovatusiyana goi bei koyagoi kai moitamō Guyau ina vamoleyanayao. ⁷ E geya latuwoma liuna kavinimi, tauna kakawanoi Yaubada yaina goi bego geya tayaamo goyo koguinuwe. Go ima kawanoiyana geya bego tomota sikamoitamōema kai Yeisu ina vamoleyanayao geya, go sem nakona tomota geya sikamoitamōemeta go, tuwo ima kawanoiyana bego komi dogoi dedevidi koguinuvedi. ⁸ Neta imi sinapu dedevina, liuna geya itoboinemeta kavinimi. Bogina koyagoi. Kai geya itoboinemeta sinapu mooitamōidi kavakaleyedi, go sem kavaliitūlituwo sinapu moitamōidiyadi manudi. ⁹ Guna nuwonūwana ataligei. Kauyāwana tutayana ima lovina liuna manuna kaneneta, neta komi imi numisa goi kotogaga. Kakawanoi Yaubada yaina iyolimemi. ¹⁰ Moe pasina nakona yau moeko yaimi goi geya go, liwola leta ame goi aginidi: Bego tutayana yaimi goi akaaiyaka lovina kasakasaina bei geya avinimita nakae itoboinegu. Go itoboinegu unana ida Tomoya goi yau magu lovina. Lovinayana moe bego imi numisa akitogage go, geya bego akaigoyai.

Paulo ina vaduduwo

(2 Korinta 13:11-13)

¹¹ Segowo, kouyāwana! Semiyao kok-abivekovekomnēidi. Semiyao kokipaiwolēdi. Mami nuwovavasa. Kotubōina. Neta moe

sinapuyadi koguunuwedi, Yaubada, Tauyana matakoi be tuboina unadi, yaimi goi bei ikaaiyaka.

¹² Sedao moeko goi koyoowoiidi nakae komi kimaasabaimi Yaubada umana itoboinemi. Tauyadi Yaubada ina kimasabayao liliudi ameko goi idi yabobona yaimi.

¹³⁻¹⁴ Ida Tomoya Yeisu Guyau ina kanuwóiya be Yaubada ina matakoi be Baloma Kimaasabaina ina kabivekoveko bei sikaaiyaka yaimi.

Yau Paulo

Buki Kimaasabaina
The New Testament and part of the Old Testament of
the Holy Bible in the Gumawana language of Papua
New Guinea

Buk Baibel long tokples Gumawana long Niugini

copyright © 2019 Wycliffe Bible Translators, Inc.

Language: Gumawana

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-04-25

PDF generated using Haiola and XeLaTeX on 25 Apr 2024 from source files dated 25 Apr 2024

f9f7eba6-5e01-5185-879c-f0546200c596